

CARTA HN JEE NI TEE SAN PEDRO APOSTOL NUU ÑAYUU CACANDIJE

1 Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyūcu jíca ró nń Ponto, Galacia, Capadocia, Asia, jíin Bitinia. ²Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayīví. Te jíin Espírítu Santo ni sáha ya jeē iyó ndoo íyó íi rō cájetáhú ró núū yā, te ni nacate ya anuá rō jíin nńñ Jesucristo. Te ñúhun ni rī jeē na cáyá gā tāca jéē váha jeē sáha ya rohó, jíin jéē coo ndeyí coo sīi ni rō jíinánhan ró.

**Jeē ñúhun ni yō tāca jéē
váha jeē cóo andíví**

³Na cáhan yō jeē yóhoyo cújéhu Yaā Dios, Yaā cúu Tátá maá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, siquī jeē ní natecu Jesucristo mēhñu ndíyí. Te jeē yúcuan níní cáñuhun ni yō tāca jéē váha jeē coo. ⁴Chi nihin rō tahu jeē ñúhun váha ini andíví jeē cúu ró jíinánhan ró. Te tahu un má nāa cuítí, ni ma tívi cuítí, ni ma ndíhi cuítí. ⁵Chi cávandíje ró jéē sáha Yaā Dios jehē rō, te jeē yúcuan ndíto ya

rohó jíin poder yā, návāha jnama ya rohó quívī sándihí, chi ni sándaā yā jeē súcuan coo.

⁶Jeē yúcuan cácusīi ndasí ni rō, vésú cájito ró cuéhē ndinuū jnūndóho jecu-ni quívī. ⁷Chi nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuú coto ndee jnūndóho róhó núu cávandíje nihin ró chí tuú. Chi jeē cávandíje nihin ró, chi yahu ndasí gá cúu vésú oro, ndajníñu jeē nāā. Te yúcuan cúu jeē cuajnúhún yá rohó, te sájéhu ya rohó, te squéndōo yíñúhún yá rohó quívī quenda ndijin Jesucristo.

⁸Te vésú tu ní cájito ró núū yā, te cáhiyo maní ndasí ró jíin yá. Te cávandíje nihin ró yá vésú tu cájito ró núū yā vijna. Te yóhoyo luu cácusīi ndasí ni rō, chi nde tuá níhín cuítí yō jnūhun castūhun yó ndese cúsií ni yō. ⁹Te nihin tahu rō jeē cācu ánuá rō, chi jeē yúcuan cúu jeē cávandíje ró.

¹⁰Te tée ni canacani jnūhun Yaā Dios nde jenahán, ni cananducú yúcún de ni cacajnúhun váha de siquī jnūhun ndese jnama ya yohó. Te ni cacachi de ndese sáha Yaā Dios jeē váha róhó jíinánhan

ró. ¹¹Chi nde ná tu coo, te ni steén Espíritu Cristo nuū de jíjnáhan de ndese quiji jnūndóho síquī Cristo jíin ndese luu ndujéhu tucu ya jeē yáha jnūndóho ún. Te ni cananducú yúcun de jeē na jécūhun ni de ndé quívī quiji Cristo te ndese coo tāca jēē ni cáhān maá Espíritu jeē ndeé ini de. ¹²Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jnūhun ún, chi tāca tēē nácani jnūhun jnáma ya yohó, ni canacani de nuū rō, ni sáha poder Espíritu Santo jeē ní quiji ichi andiví. Te jnūhun ún chi nde maá ndajéhé Yaā Dios cánanducú návāha na jécūhun ni.

Cúní yā jeē coo ndoo ánuá yō

¹³Jeē yúcuan ndito na cóo xinī rō jíjnáhan ró, te cájí coo ni rō. Te cocuhun ndasí ni rō jeē nihín rō tāca jēē váha jeē sáha Yaā Dios rohó quívī quenda ndijin Jesucristo. ¹⁴Te na cúu ró séhe jeē cájetáhú váha. Te ma sáha ga rō tācá jniñu jeē ní cacusī ni rō sáha ró nde ná tu jecūhun ni rō jnūhun Yaā Dios. ¹⁵Chi sa suhva na cóo ndoo ánuá rō jíin tāca jniñu cásáha ró, chi Yaā ní cana rōhó, Yaā iyó ndoo cúu ya. ¹⁶Chi súcuan cáhán tutu ii: Na cóo ndoo ró jíjnáhan ró, chi ruhū iyó ndoo ri, achí yá.

¹⁷Te núu cácahān rō Tatá rō jíin Yaā Dios, núu súcuan te na cáca yíñuhún ró nuū yā tāca quívī jēē cájica ró ñayīvi yáha. Chi máá yá sándaa síquī ndese ni casáha iin iin yó, te tu sáha ya cuenta ndese cúu iin iin yó, chi inuú sáha ya jíin

ndihí yó. ¹⁸Chi ni jnama ya rohó núu tācá costumbre jeē ní cajequin jíi rō, jeē ní cajejnīñu cáha ró núu. Te cájini vāha ró jēē yahu cúu jeē ní jnama ya rohó. Chi tu ní chúnaa yā jíin ndajniñu jeē náā, nájñūhun oro jíin plata, ¹⁹chi sa suhva jíin níñī Cristo jeē yáhu ndasí gá cúu. Chi ni socō yā maá yá nájñūhun iin londe, quitī íyó váha íyó ndoo. ²⁰Chi jeē yúcuan ní jeni Yaā Dios maá Cristo nde ná tu jecōo ñayīví, te ni cane ndijin Cristo maá tiempo cuándihí yáha, návāha quendōo váha ánuá rō jíjnáhan ró. ²¹Te jeē jíin Cristo te cácadíje ró Yaā Dios. Chi ni sáha Yaā Dios jeē ní natecu yā mēñū ndíyi jíin jēē ní ndujéhu ya. Te jeē yúcuan cácadíje ró Yaā Dios, te cáñūhun ni rō coto ró yá.

²²Te vijna chi je ni candundoo ánuá rō, chi ni cajetáhú ró jnūhun ndaa ni sáha Espíritu jíin ró, návāha cundáhú ndije ni rō hermano cácadíje. Núu súcuan te na cundáhú ndasí ni rō jnáhan ró nde jíin ini jíin ánuá rō. ²³Chi je ni canacacu jeé ró, te nasūu chíji yucūn ñayuu jeē cúu. Chi sa jnūhun Yaā Dios jeē ndito técu ní cání ni sáha jeē ní nacacu ró. ²⁴Chi súcuan cáhán tutu ii:

Nájñūhun yucū cúu ndihí tāca ñayuu, chi jecu-ni quívī técu i. Te nájñūhun ita yucū cúu jeē cujéhu i. Chi íchí-ni yucū, te ndáhvá-ni ita.

²⁵Te jnūhun Jitoho yō Yaā Dios, sa quendōo ní cání. Achí tutu. Te jnūhun un cúu máá jnúhun jnáma ya yohó jēē ní canacani ri nuū rō.

2 Núu súcuan te na siáá rō tācá jniñu néé, tāca jéé stahú, jéé tú ndije, jeē cucuésún ni, jíin jéé sajnúhún siquī jnáhan. ²Te nájnūhun sūchi yíquín sá ní cacu jeē jéxin te jéhnú, súcuan na cóndihvī ni rō scuáha ró jnúhun ndaā yā, návāha cuehnu ró jíin te cācu ánuá rō. ³Chi je cájini rō jeē yóhoyo váha ni maá Jítóho yō.

Cristo cúu nájnūhun yuū yítuu vehe

⁴Núu súcuan te manī gā coo ró jíjnáhan ró jíin Jítóho yō Cristo. Chi cácuu ró nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun iin yuū cánuú gá jeē yítuu yiquī templo, te sáha ya jeē cótecu rō ní cání. Te ñayuu vēsú ni casquéhichī i ya, te Yaā Dios chi je ni nacāji ya Cristo chi cánuú ndasí yá, nájnūhun nacāji yó iin yuū váha jeē quítuu yiquī vehe. ⁵Te maá ró chi cácuu ró nájnūhun iin yuū jeē cúvāha templo Yaā Dios, te cotecu rō ní cání. Te na cuáha ró jnúhun jeē sama ya rohó jíjnáhan ró jéé cúvāha templo yā, cúu jeē ndeé Espíritu yā ini anuá rō nájnūhun ini iin templo. Te suni cúní Yaā Dios jeē cuu ró sūtū cáhiyo ndoo cájejniñu nuū yā. Chi siquī jeē ní sáha Jesucristo jehē rō, te na sócō rō maá ró jeē cuajniñu ró núu yā sáha ró táca jniñu váha jeē núnjahan ni Yaā Dios. ⁶Chi súcuan cáhán tutu i:

Vijna te nde ñuu ri Sion jéquin ri iin yuū jeē cánuú gá jeē quítuu yiquī vehe, chi ni nacāji ri yā nájnūhun iin yuū váha jeē cánuú téyí.

Te ñayuu jeē candíje i ya, jnama nahín yá i.

Achí Yaā Dios, áchí tutu. ⁷Te maá ró jeē cáncandíje ró, chi yuū váha jeē cánuú téyí cúu ya nuū rō. Te nuū ñayuu tu cáncandíje chi tuú, chi sa cúndaā jeē cahán tutu i:

Maá yúu jeē ní casquéhichī tēe cásama vehe, suu cúu yuū cánuú gá yítuu yiquī vehe.

⁸Te suni cúndaā jnúhun jeē cahán tutu siquī ñayuu tu cáncandíje:

Cúu ya nájnūhun iin yuū jeē cácachihī i jehē i, nájnūhun toto jeē cotúú i sáha.

Achí. Chi jeē cácachihī i jehē i cúu jeē casániñni ni i nuū jnúhun ya. Te je ni cúndaā jeē jnahnú ndetū i siquī jeē cáacunihni ni i.

Jnúhun ñayuu maá Yaā Dios

⁹Te maá ró cácuu ñayuu jeē ní nacāji Yaā Dios. Te suni cácuu ró sūtū cájejniñu nuū maá Yaā cúu Rey, te ñayuu cáhiyo ndoo, jíin ñayuu maá yá cácuu ró. Súcuan ni sáha Yaā Dios rohó návāha nacani ró jnúhun ndese yóhoyo jéhnú jniñu sáha ya, chi maá yá ni cana róhó ná ni coyūcu ró nájnūhun nuū néé. Te ni squívicoo ya rohó núu luz yā jeē yóhoyo váha stéén yā ini anuá rō.

¹⁰Chi nde saá te nasūu ñayuu Yaā Dios cácuu ró, te vijna je ni nduu ró ñayuu maá yá. Te nde saá chi ná tu cundáhú ni yā rohó, te vijna je cundáhú ni yā rohó jíjnáhan ró.

Jeē cuajniñu váha yó núu Yaā Dios

¹¹Ñáni manī, ini ñayivī yáha cácuu ró nájnūhun ñayuu ñuu jicá jéé cájica cuu tátú. Núu súcuan

te cáhán ndahú rí jíin ró jéē ma sáha ró táca jniñu jeē ndíyo néé ni rō jíin modo maá ró. Chi táca un cájejnáhan jíin ró, ndúcú jéē jnahnū ndetū anuá rō. ¹²Te ndaā na cáca ró méhñu ñáyuú tu jíin jñūhun Yaā Dios. Chi vēsú cácahān i siquī rō, nájñūhun cácahān i siquī ñáyuú casáha jniñu néé, te núu na cóto i jniñu váha casáha ró, te quivī sándaā Yaā Dios jniñu te cahān i jeē yóhoyo cújéhnū ya.

¹³Jeē siquī maá Jítoho yō te cuatáhú ró nuū táca tóhō cándiso jniñu nuū ñáyuú. Cuatáhú ró nuū maá rey, chi tēe cújéhnū ga cúu de. ¹⁴Te cuatáhú ró nuū táca gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu váha. ¹⁵Chi cúní Yaā Dios jeē sáha ró jniñu váha, te jeē súcuan sáha ró te táca ñáyuú canéé jéē tu cájēcūhun ni, casi i yuhu i.

¹⁶Te na cáca ndaā rō jeē cácuu ró ñáyuú ni nduu libre anuá, te nasūu jéē ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajníñu vāha ró núu yā. ¹⁷Coo respeto rō nuū táca ñáyuú. Cundáhú ni rō hermano cácañdije. Conso iyo ró núu Yaā Dios. Coo yíñúhún ró nuū maá rey.

Jeē na ndóho yó jéhē jnáhan yó nájñūhun ni ndoho Cristo

¹⁸Róhó jéē cácuu mozo, cuatáhú ró nuū patrón rō, te coo respeto rō nuū de. Te nasūu máa-ni nuū tēe vāha ni jíin tēe vitá ni, chi suni nuū tēe xeēn ni. ¹⁹Chi iin jeē váha cúu núu jéndeyí ni iin tēe jeē stóho cáha ñáyuú de siquī jeē squícu de

nuū Yaā Dios. ²⁰Chi núu cástóho i róhó jéē casáha ró cuēchi, te ni iin ma cuajnúhún róhó núu jéndeyí ni rō jíin jeē ndóho ró. Te núu cástóho i róhó jéē casáha ró jniñu váha, te núu jéndeyí ni rō jíin, yāha cúu jeē váha jeē núnahan ni Yaā Dios.

²¹Chi jeē yúcuan cúu jeē ní cana ya rohó jíjnáhan ró. Chi suni máa Cristo ni ndoho ya jeē siquī rō, te súcuan ni cuu ya iin ejemplo nuū rō jeē na ndóho ró jéhē jnáhan ró, te súcuan condiquin rō ichi ya. ²²Te máa yá tú cuiti na cuēchi ní sáha ya, ni tú cuiti na jñūhun stáhú ní cáhán yā. ²³Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjñáhan ya jíin i, chi sa ni chihi ya maá yá ndaha Yaā Dios, Yaā sándaā vāha siquī ndíhi ún. ²⁴Te ni condiso máa Cristo cuēchi yó jíin yiqui cúñu yā ná ni jihī yā jicā cruz, návāha quenda yó chíji cuēchi te caca ndaā yō. Chi ni tujī yā, te jeē yúcuan ní canduvāha ánuá rō. ²⁵Chi ni casana ró nájñūhun lanchi, te vijna je ni candicó ró ni ndívicoo ró núu Cristo, Yaā cúu pastor rō te ndíto vāha ya anuá rō.

Ndese cánuú coyūcu váha yii jíin ñasihí

3 Suni súcuan róhó ñasihí jíjnáhan ró, cuatáhú ró nuū yii ró, návāha núu cúu de tēe tu cándije jñūhun ya, te cuu scándije ró de, jeē tuá niní jíin jéē cahán rō, chi máa jíin jéē casáha vāha ró. ²Chi cuni de jeē cájica ndaā rō te cáhiyo respeto rō. ³Te jeē casáha luu ró máa ró, chi nasūu máni máa ichi siquī rō sáha ró, jeē sáha luu

ndasí ró xinī rō, chí jéē cúhun ró síquī oro chí sahma váha ga. ⁴Chi sa nducú ró jeē quéndōo luu ánuá rō, te coo luu ró ñin modo jeē ma náā cuiti, suu jeē cóo vitá ni rō te coo nahín ni rō. Chi yāha cúu jeē yahu ndasí gá nuū Yaā Dios. ⁵Chi ñahan ní cahiyo ndoo ánuá nde jenhán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yī ña. ⁶Te súcuan ni sáha Sara, chí ni jetáhú ña nuū yī ña Abraham, te ni cahán yīñúhún ña jíin de. Te róhó jíjnáhan ró, núu sáha vāha ró te núu ma yūhu ró ni ñin, yūcuán na te coo ró nájnūhun ni iyo Sara.

⁷Te suni súcuan róhó yī, na cóo vitá ni rō jíin ñasihí ró. Te yīñúhún coo ró jíin ña, síquī jeē núu ga fuerza ña vēsú rohó, te suni síquī jeē inuú ní canihín tahú rō cotecu rō ní cáni síquī jeē váha ni Yaā Dios. Te súcuan sáha ró návāha tú casi nuū jnūhun jícan tahú rō.

**Jnūhun ñayuu cándoho
síquī jeē cájica ndaā**

⁸Núu súcuan te inuú na cáni ni rō jíjnáhan ró, te cucuíhyá ni rō jeē ndóho jnáhan ró, te cundáhú ni rō i nájnūhun ñani rō. Te na cóo mani rō te cani suchí ni rō. ⁹Núu casáha neé ñayuu jíin ró, te ma nasáha neé ró jíin i. Te núu cácahán neé i nuū rō, te ma nácahán neé ró núu i. Chi sa suhva cacān tahú rō jeē na quéndōo vāha i. Chi Yaā Dios ni cana ya rohó jéē suni súcuan quendōo vāha ró. ¹⁰Chi súcuan cáhán tutu i:

Ñayuu cácuni cotecu vāha te cusī ni tāca quívī,

na cóto i yuhu i jeē ma cáhán neé i,
te na cóto i jeē ma cáhán i
jnūhun stáhú.

¹¹Na cújiyo i nuū jniñu neé, te na sáha i jniñu váha.
Na ndúcú i coyūcu mánī i, te na cóndihvī ni i jíin.

¹²Chi máá Jítóho yō ndíto ya ñayuu ndaā,
te jíni nahín yá jeē cájicān tahú i.
Te ñayuu casáha jniñu neé, chí tu jétáhú yá i.

Achí tutu.

¹³Te ni ñin ma sáha neé jíin ró te núu mánī jniñu váha cándihvī ni rō sáha ró. ¹⁴Te vēsú núu ndóho ró síquī jeē cájica ndaā rō, te yōhyo ndetū cácuu ró. Núu súcuan te ma yūhu ró coto ró i, ni ma cunéé ni rō. ¹⁵Chi sa jíin ini jíin ánuá rō chíñúhún ró maá Jítóho yō Cristo. Te níni coo tūhva ró nastió cuñí vīta ró te cahán yīñúhún ró jíin ñayuu jeē castíchí rohó síquī tāca jéē cáñuhun ni rō. ¹⁶Te caca ndaā rō jeē tú na cuēchi condee anuá rō, návāha ñayuu cácahán neé síquī rō, cucanu i jeē ni stáú yáhu i róhó jéē cájica ndaā rō chí cácañíje ró Cristo. ¹⁷Chi núu cúnī Yaā Dios te vāha ga jeē ndóho ró síquī jeē casáha ró jniñu váha vēsú síquī núu sáha ró jniñu neé.

¹⁸Chi máá Cristo suni ni ndoho ya, te ñin jínu-ni ni jihī yā jeē síquī cuéchi ndíhi yó. Yaā vāha cúu ya, te ni ndoho ya jehē yohó ñayuu ní casáha jniñu neé, návāha quívicoo yó núu Yaā Dios sáha ya. Chi ni jihī yiquí cúñu yā, te ánuá yā chí técu-ni ní cáni. ¹⁹Te ná ni jihī yā

te ni jehēn anuá yā ni nacani ya jñūhun nuū anuá ñayuu cáyindihyū.

²⁰Chi nde jenahán tu ní cájetáhú i, ná ni iyo paciencia ni Yaā Dios te ni condetu ya níní sáha Noé barco jeē naní arca. Te jíin arca un ní cācu jecu-ni ñayuu, chi unā-ni i ni cācu nuū ndúte. ²¹Te nájnūhun ni cacācu i nuū ndúte, súcuan cúu jeē jéndute yó vijna te cācu ánuá yō. Te jeē jéndute yó, nasūu jéē ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúu yó jíin Jesucristo nuū jnúhun ni natecu yā. ²²Te ni ndaa ya cuanuhun yā andiví, te ndéé yá ichi ndáváha Yaā Dios nuū cujéhnu ya. Te tēcá ndajéhé andiví, jíin jéē cándacu jniñu, jíin jéē cájnií poder, cájendetū nuū yā.

**Jeē na cuájniñu yó jíin táhū
jeē ni jéhe ya nuū yō**

4 Núu súcuan te nájnūhun ni ndoho Cristo jehē yō jíin yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yiqui cúñu, tuá sáha i cuēchi. ²Núu súcuan te níí tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo néé ni rō jíin modo maá ró. ³Chi nde níí vèji ró, te ni casáha ró cuéhē cuēchi jeē cánujnahán ni rō siquī jeē tu ní cájini rō jñūhun Yaā Dios. Te tiempo un mání maá jéē neé ni casáha ró, te ni candiyo ni rō tāca jéē neé, ni canajini ró, ni casáha ró vico néé, ni cajihí ndasí ró nuū víco ró, te ni cachínúhún ró ídolo jeē ni cáhān Yaā Dios jeē ma

chínúhún yó. ⁴Te cáacunéé ni i jeē tuá cájica ró jíin i jeē sáha ró táca cuēchi xeēn jíin i. Te jeē yúcuan cúu jeē cácahān neé i siquī rō. ⁵Te máá i chi iin quiví te nacuāha i cuenta nuū maá Yaā jeē iyó túhva ya sándaā yā jniñu ñayuu técu jíin ñáyuu ní cajihí. ⁶Chi jeē yúcuan suni ni quiji jñūhun vāha ya nuū tāca ndíyi ná ni cotecu i. Te ni cundaā siquī cuēchi ni casáha i ñayiví yáha, nájnūhun cúndaā siquī ndihí ñayuu, návāha nacani ni i te cotecu anuá i níí cáni nájnūhun técu Yaā Dios.

⁷Te je cuacuyajni quiví jeē náā tāca jéé iyó. Núu súcuan te ndito na cóo xiní rō jíināhán ró, te condihví ni rō cacān tahú rō. ⁸Te jeē cánuú gá cúu jeē cundáhú ndasí ni rō jnáhan ró. Chi núu cundáhú ni yō jnáhan yó, te íyo jnúhun cáhnu ni nuū cuéhē cuēchi. ⁹Sáha vāha ró jíin ñáyuu jeē jinú i vehe ró, te ma cúxii ni rō. ¹⁰Tāca ró cuajniñu ró núu jnáhan ró, núu ndese íyo máá táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē síin síin ni jéhe ya nuū iin iin ró. ¹¹Núu tahū jeē nácani ró jnúhun cúu, te na cáhán rō nájnūhun jeē maá Yaā Dios cahán. Te núu tahū jeē chindéé ñáhán ró jnáhan ró cúu, te na sáha ró jíin fuerza jeē ni jéhe ya nuū rō, návāha jíin ndihí jeē casáha ró te cahān ñayuu jeē yóhoyo cújéhnu Yaā Dios siquī jeē ni sáha ya jíin Jesucristo. Te na cáhán yō jeē luu cújéhnu Cristo te jnií ya poder níí cáni. Amén.

**Jeē ndóho yó síquī jeē
candíje yó Cristo**

¹²Ñání mání, núu vèji jñúndóho xeēn jeē coto ndee rohó, te ma

cunéé ni rō cani ni rō jeē maá rō ni nihīn jnūndóho xeēn gā. ¹³Chi sa cusīi ni rō jeē cándoho rō jecu jnūndóho jeē ní ndoho Cristo, návaha suni cusīi ndasí ni rō quivī quénda ndijin yā jeē kujéhu luu ya. ¹⁴Te yōhyo ndetū rō te núu cácahān neé i nuū rō siquī jeē cácaandíje rō Cristo. Chi máá Espírītu Yaā Dios jeē kujéhu ndasí, ndéé yá ini rō. Máá i chi cácahān neé i siquī yā, te máá rō chi cáchiñúhún rō yā. ¹⁵Te núu ndoho rō, te na ndóho rō siquī jeē cácaandíje rō Cristo. Te ma ndóho rō siquī tāca cuéchi nájñuhun cándoho ñayuu jéhu ndīyī, ñayuu sacuíhná, ñayuu sáha jniñu néé, jíin ñáyuu quívi nduu nuū jniñu jnáhan jeē tu cánuú quívi nduu. ¹⁶Te sa núu iin rō ndóho siquī jeē candíje rō Cristo, te ma cúcanu rō, chi sa nacuatáhú rō nuū Yaā Dios siquī jeē cúu rō cristiano.

¹⁷Chi je ni jinū quivī jeē quejéé sándaā Yaā Dios cuéchi, te xihna gā ñayuu cácuu sēhe ya sándaā yā cuéchi. Te núu xihna gā cuéchi máá yó quejéé yá sándaā yā, núu súcuan te xeēn gā coo jeē ndénehen ya cuéchi siquī ñáyuu jeē tu ní jétáhú jnúhun vāha ya. ¹⁸Te núu yōhyo yíí cácu ñayuu vāha, núu súcuan ¿te ndese cácu ñayuu casáha jniñu néé jíin tāca cuéchi? ¹⁹Núu súcuan te róhó jéé cándoho siquī jeē súcuan cúni Yaā Dios, ma jécuiñī rō sáha rō jniñu vāha, te na chíhi rō máá rō ndaha máá Yaā jeē ni sáha róhó, chi squícu ya jeē ni jéjñuhun ya.

Jeē jéhe de consejo ñayuu cácaandíje

5 Vijn te na cáhan rī jíin tāca róhó téé jéhu cándito ñayuu

cácaandíje, chi suni téé jéhu ndíto ñayuu cácaandíje cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhu ri jíin rō sáha Cristo quivī quénda ndijin yā. ²Na cóto yúcún rō ñayuu jeē ndeé jniñu rō condito rō, jeé cácuu i nájñuhun lanchi Yaā Dios. Te na cúsi ni rō condito rō i, chi súcuan cúni Yaā Dios. Te nasūu síquī jeé sáfuerza yā rohó, ni nasūu síquī jeé nihín rō xühún, chi sa siquī jeé cuní rō cuajniñu rō. ³Te nasūu jéé ndacu nihin rō jniñu nuū ñáyuu cándito rō, chi sa nducú rō cuu rō iin ejemplo nuū i jeé cácuu i lanchi ya. ⁴Yūcuán na te quivī quénda ndijin maá Yaā cúu Pastor kujéhu nuū rohó téé cácuu pastor lanchi ya, te cuāha ya premio nuū rō jijnáhan rō jéé yóhyo luu te ma náā cuíti.

⁵Te suni róhó tāca téé suchí, na cuándetū rō nuū tāca téé jéhu jñā. Te ndíhi róhó ñáyuu cácaandíje, cuándetū rō nuū jnáhan rō, te cani suchí ni rō. Chi suhva cáhan tutu:

Yaā Dios jési yā nuū ñáyuu casáha téyí máá,

te vāha ni yā chíndéé ñáhan yá ñayuu casáha suchí máá.

Achí. ⁶Núu súcuan te na cáni suchí ni rō, chi cáyihí rō ndaha Yaā Dios jeé jniñ poder. Te sájéhu ya rohó, na jíinú maá quívi. ⁷Tāca jéé cáncani ndasí ni rō siquī, chíhi rō ndaha máá yá te máá yá coto, chi ndíto ya rohó.

⁸Te cájí na cóo xinī rō te ndito coo ni rō. Chi jexeén jeé jito uhū rohó, jíca cuu ndúcú squívi róhó jijnáhan rō núu cuéchi. Te xeēn gā sáha vésú ndicaha jeé iyo ndáhyú.

⁹Te cuiñi nihin rō jéé ma cúndeyí

jexeén jíin ró, te nihin candíje ró jnúhun cundáhú ni yā rohó. Chi cájini rō jeē suni súcuan cándoho hermano rō jeē cáyūcu níí cáhnu ñayiví. ¹⁰Te núu ni jīnu jeē ndoho ró jecu-ni tiempo, te Yaā Dios chi sáha ya jeē ije vāha ni rō jíin jnúhun ya, jíin jéē cuñī nihin ró, te cuāha ya fuerza ini rō, te quendōo cutú ró níí cáni. Chi máá yá cúu jeē sáha tāca jéē váha yóhó, te ni cana ya yohó jéē cujéhnu luu yó jíin yá níí cáni, siquī jeē nduú yó jíin Jesucristo. ¹¹Te na cáhán yō jeē yóhoyo luu cújéhnu ya te jnī ya poder níí cáni. Amén.

Saludo jeē sándīhí

¹²Jíní rī jeē Silvano cúu ññ hermano jeē squícu vāha. Te máá

de cuajeē nuū rō jíin carta yáha jéē ní tee ri jecu jnúhun. Te jíin yáha stíhví ni rī rohó, te cáhán rī jíin ró jeē ndaá cúu jeē tāca jéē váha ni sáha Yaā Dios rohó, suu stéén nuū rō jeē cundáhú ndije ni yā rohó. Te na cuñī nihin ró jíin jnúhun yáha.

¹³Ñayuu cá candíje jeē cáyūcú ñnu Babilonia, jeē ní nacāji ya i nájnúhun ni nacāji ya rohó, cácahān i jeē sándeyí ni rō. Te Marcos, tēe cúu nájnúhun sēhe ri, suni súcuan cáhán de. ¹⁴Te núu na cáhán rō jíin jnáhan ró, te techūhu mánī rō ndaha i.

Te na cóo ndeyí coo siñ ni ndīhi ró jéē cáyīhi ró ndaha Jesucristo. Súcuan na cóo. Amén.